

Bosnia and Herzegovina
Federation of Bosnia and Herzegovina
CANTON SARAJEVO
Ministry of Physical Planning Construction and
Environmental Protection

Broj: 05/01-05-33063-3/19 RA
Sarajevo, 10.12.2019. godine

SKUPŠTINA KANTONA SARAJEVO

- o v d j e -

n/r Elmedin Konaković, predsjedavajući

PREDMET: Odgovor na zastupničku inicijativu – zastupnik Elvis Vreto, dostavlja se

Zastupnik u Skupštini Kantona Sarajevo, Elvis Vreto, na 13. Radnoj sjednici Skupštine Kantona Sarajevo, održanoj dana 25.09.2019. godine, u okviru tačke Dnevnog reda "poslanička/zastupnička pitanja, inicijative i odgovori", pokrenuo je inicijativu, kako slijedi:

"Na osnovu člana 106. Poslovnika Skupštine Kantona Sarajevo ("Službene novine Kantona Sarajevo", broj 25/10, 14/11, 19/11, 7/12, 26/12), Vladi Kantona Sarajevo, tačnije resornom ministarstvu upućujem inicijativu da se planiraju sredstva od dva miliona KM u budžetu KS za 2020. godinu i uredi lokalitet Stojčevca putem JU za Zaštićena prirodna područja Vrelo Bosne, koja trenutno upravlja područjem. Potrebno je:

- postaviti oznake, klupe, kante za smeće, urediti pješačke staze i prirodno jezero unutar kompleksa,
- uraditi rekonstrukciju nekadašnjih sportskih sadržaja kao i uraditi novi sportsko rekreativni mobilijar za djecu i odrasle,
- zaštititi i konzervirati postojeće objekte od daljnjeg propadanja zbog sigurnosnih razloga i onemogućiti pristup unutrašnjim dijelovima objekata,
- hortikulturno urediti područje i ograditi prostor.

OBRAZLOŽENJE:

Svjedoci smo da je područje Stojčevca već 23 godine zapušteno i prepušteno samo sebi. Do rješavanja formalno pravnog statusa potrebno je prostor urediti na osnovu prava na upravljanje koje ima JU Vrelo Bosne, Kanton treba planirati u dogovoru sa Općinom Ilidža finansijska sredstva i urediti taj prostor za naše građane kao prvu fazu sanacije i uređenja tog lokaliteta do konačnog rješavanja pravnog statusa. Usvajanjem inicijative privremeno bi se riješio problem, zatim iskoristio potencijal i prirodno bogatstvo tog područja kako bi ga građani dostojanstveno koristili taj prostor koji u budućnosti treba postati novi Centar za edukaciju, sport i rekreaciju po uzoru na već sličan u Novom Gradu."

ODGOVOR:

Lokalitet Stojčevca zajedno sa ruševinama nekadašnjeg rezidencijalnog kompleksa Titovih vila sa pomoćnim objektima i podzemnim tunelima nije u vlasništvu Kantona Sarajevo. Međutim, ovaj lokalitet nalazi se unutar obuhvata Druge zone zaštite Spomenika prirode "Vrelo Bosne", kojim upravlja Kantonalna javna ustanova za zaštićena prirodna područja, shodno važećim propisima.



Upravljanje Spomenikom prirode "Vrelo Bosne", pa samim tim i područjem Stojčevca temelji se na očuvanju i unaprijeđenju brojnih prirodnih, pejzažnih, hidroloških, kulturno-historijskih i drugih vrijednosti, te usklađivanju istih sa zaštitom, korištenjem i razvojem područja.

Značajno je istaći, da se radi o području sa visokim stepenom biodiverziteta, dok rezidencijalni kompleks Titovih vila sa tunelima predstavlja značajnu kulturno-historijsku vrijednost, čemu svjedoči činjenica da je Kantonalni zavod za zaštitu kulturno - historijskog i prirodnog naslijeđa Sarajevo, ove podzemne tunele uvrstio na listu evidentiranih spomenika.


Iz tog razloga bi kod svakog budućeg planiranja namjene i korištenja ovog prostora trebalo voditi računa da se radi o vrijednom kulturno - historijskom i turističkom potencijalu, pri čemu okolna vegetacija zajedno sa vodnim ekosistemom i postojećom faunom predstavlja prirodnu cjelinu. Upravo raznolikost biodiverziteta, kao i postojanje više vještačkih jezera doprinose velikoj ambijentalnoj i pejzažnoj vrijednosti predmetnog lokaliteta, a time i cjelovitosti i reprezentativnosti čitavog zaštićenog prirodnog područja. Međutim, neriješeni imovinsko - pravni odnosi, te sukobi interesa različitih zainteresovanih strana na lokalitetu Stojčevca, dovode do situacije da je ovo područje potpuno infrastrukturno neopremljeno, što je jedan od direktnih uzročnika degradacije njegovih valorizovanih vrijednosti.

U nastojanju da se konačno otpočne sa aktivnostima na rješavanju imovinsko - pravnih pitanja, Kantonalna javna ustanova za zaštićena prirodna područja se u proteklom periodu obratila različitim institucijama na federalnom i državnom nivou (Parlamentarna skupština Bosne i Hercegovine, Ministarstvo odbrane Bosne i Hercegovine, Oružane snage Bosne i Hercegovine, Federalno ministarstvo unutrašnjih poslova, Služba za zajedničke poslove organa i tijela Federacije Bosne i Hercegovine, te Ministarstvo finansija i trezora - Sektor za poslove sukcesije bivše SFRJ i upravljanje imovinom BiH) i to molbom za dostavu informacija o vlasništvu na prostoru Stojčevca koji uključuje i ruševine rezidencijalnog kompleksa Titovih vila sa pomoćnim objektima i podzemnim tunelima, a koji administrativno pripadaju općini Ilidža.

Nažalost, do danas je dobijen samo odgovor od strane Federalnog ministarstva unutrašnjih poslova, u kojem je navedeno da je Općinski sud u Sarajevu nadležan za davanje traženih informacija o vlasništvu nekretnina, a samim tim i o vlasništvu podzemnih tunela kompleksa na Stojčevcu.

Do dobijanja konkretnijih informacija po ovom pitanju, a u kontekstu odgovora na zastupničku inicijativu, ističemo da će ovo Ministarstvo, a pogotovo Kantonalna javna ustanova za zaštićena prirodna područja u okviru svoje primarne funkcije i djelatnosti, nastavljati izdvajati finansijska sredstva za aktivnosti na uređenju, zaštiti i održivom korištenju čitavog prostora Vrelo Bosne, pa tako i lokaliteta Stojčevac, pri čemu se konkretno misli na instaliranje parkovskog mobilijara, kanti za odlaganje otpada, uređenje staza, postavljanje adekvatnih oznaka i sličnih sadržaja. Takođe, ne treba zanemariti i činjenicu, da će se područje Stojčevca detaljno sagledati i sa aspekta novog desetogodišnjeg Plana upravljanja Spomenikom prirode "Vrelo Bosne", čija je izrada uveliko u toku.

S poštovanjem,



Dostaviti:

- ① Naslov
- Stručna služba Vlade Kantona Sarajevo, ove
- Kantonalna javna ustanova za zaštićena prirodna područja, ul. Branilaca Sarajeva br. 28, n/r direktora (informativno)
- Evidencija
- a/a



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029,
Fax: + 387 (0) 33 562-031
Sarajevo, Reisa Džemaludina Čauševića 1

